

## Egei Sasafei Pitaha Nalama Nei

### Tawale Ta

Yesuha dabai degedi o olou feibe 12 kege deleigui. O tanou ta e hu be Pita, e hu tabe Saimon. Kuguo koume e nalai.

Pita e kuguo kou, o sasai hagi dugulo idi kediamokou nalama nei. O sasai kediamme Yesu Kelesukou damaleyodele i kaha degemou, ho oe diamokou hagi hiyedo nele idi. Pitaha kegedi ke tawale gue degemou, kegeligi dia kesigieba, die damaleyodei ke tou fogou ye domou, e dia dedei sasagiemou kuguo kou kuhe nalama nei.

Kuguo ta uwage nalai kokou be, Pitahage eme sa Babilon tie oyodei.\* Ta keme ta makai. Tewe o kediage Pita eme sa hiyedo Romkou dalali, kuguo kou kuhe nalaiyode tawale ili. Yobe, sa hiyedo Babilon oe midihou kasagai hiyedo milou ga idi sagai be, sa hiyedo Romkou gene kenou tefele degele idi kaha degemou.

*Kuguo 1 Pita koumaha ta sibige tanou tanou olou feibe kuhe:  
Ta Hiye 1:1-2:10*

Dibe Godiha o sasai degei kaha degemou, di bi bolodo Godiha dimokou nele kenou diaba, midihou bolonou milou ga dalame.

*Ta Hiye 2:11-3:22*

---

\* : (Tawale ta) Na 1 Pita 5:13 dugu.

O sasai kedia diho tageya ke di midihō doudonō  
milōu ga suluguame.

Ta Hiye 4-5

Damaleyodele i o sasai kediamē tefele dugu hiyedo  
duguomōu, hagi hiyedo dugulo i.

Dibe Godihā o sasai degei kaha degemōu,  
di bi bolodo Godihā dimokōu nele kenōu  
diaba, midihō bolonōu milōu ga dalame

(Ta Hiye 1:1-2:10)

<sup>1</sup> Ame Pita, Yesu Kelesuhā tā-bolofei-malā-siadi-o. A  
kuguo kōume Godihā yōu ē biyodema makai o sasai  
nimokōu nalolu. Mogo diama, afu ni di sa tōu fogōu  
fogōu ya, sa ahudo Pontusbōu, Galesiabōu, Kapadosiabōu,  
Esiabōu, Bitiniabōu keleya ke dalagua o sasai nimokōu  
a kuguo kōu nalama neli kuhe. <sup>2</sup> Afudo, Aye Godihage  
nime kōu tewe delei, yōu ē bi bolō degeleyodema makai.  
Habage, Duo Bolofeiha hagua, ni duledu dabai degeiba,  
nime Yesu Kelesuhā tā dulo sesemabodomōu, ē kafeiye ni  
bigima mei degei. Godihā nimokōu hiyedo habagugueiba,  
nime bologuado dalamabodomōu.

*Dibe hebenitōu fologaba, bologuado dalaguale*

<sup>3</sup> Di Godihā hu hebele fogume. Eme Godi, di Hiye O  
Yesu Kelesuhā ē Aye. Godihā dimokōu solōu do hiyedo  
degeimōu, Yesu Kelesu tobōu mōu hagua, tolo imōu, yōu  
haguagi kaha degemōu, dine fi gehe, Godihā dimokōu  
neleyodei ke molōuyodema dia dalagua kuhe. <sup>4</sup> Bi Godihā  
habage dimokōu nele keme bolodo, ta tabale mei, ta

kasagai degele mei, ta mei degele mei, hebenitou you kegenou dalale ke mala ile. <sup>5</sup> Ni Kelesukou damaleyodei kaha degemou, Godiha you e neleyenou ni wolou dalali, uwage sabiyale kelege, Godiha degeleyodei keme doudo tama degeiba duguba, e ni mamolou.

<sup>6</sup> Tefele dugu kaha nimokou haguadibe tou degeifei. Ha Godiha degeleyodei keme ni kou tawalemou hoho degele ili kehe. <sup>7</sup> Nimokou tefele dugudi keme mou youwa degediyo mei. Ni damaleyodeibe de sele igi gol sagai domou kuhe tefele dugudi. Ni tewe, sele igi gol keme bi bolodo, doulukou sidibe, igi ta, haba, sele igi goldo domou kuhe sile dugudi. Nebe kenou tefei, nine tefele duguga ibe deba, ni damaleyodei ke ta tou fogou ho fogou ba, Yesu Kelesuha bohoulou ma hagubabe, o sasaiye Godikou bolofeyodema, emokou hohobolou ba, e hu hebele fogulo ile. Yobe, bi olou fei mei degeiba, sele igi gol kene mei degele. Ni damaleyodei kenou si sibige hiyedo, ta mei degele mei. <sup>8</sup> Nige Yesu Kelesube kou dugulo ili meiyee, kenou si ni e tagalemou, emokou hoho hiyedo degele ili. Damaledo, ifibe nige eme ta duguyo meiyee, haba emokou damaleyodema, hoho hiyedo degele ili. Hoho keme di ta tawaga tobolou sagai mei. <sup>9</sup> Godiha ni mamou lamou degeli, ni Kelesukou damaleyodei dalamou kaha.

<sup>10</sup> Habage-degele-duguo-tobolou-idi-o, afu deleigui kedia Godiha ni habaguguele kaha ta ke tobolou mou, Godiha di mamolou kaha yo ke dugulamou ka idi. <sup>11</sup> Kelesuha Duo Bolofeiha o kedia die duledu dalamou, diage kou gue tobolou idi, sabita, Kelesu eme hagi hiyedo

duguoba, hu hiyedo ke molou. Kege hehegiemou, kou gue yoduga idi, di mamolou o eme koboge haguale? E haguale sawisie hafei degeibabe, keiye tama degeiba dugulo? <sup>12</sup> Kenou si Godiha diamokou be, ni hehegile idi keme ni o habage hagua ile kediamokou tama degeleyode tobou. Kegemou, wefei Godiha Duo Bolofei tobou mou, hebenitou ge migilemou, ta uwo bolofei tobolou idi o kedia dogou guomou, nimokou ne ta bolofei ke tobou mou suluguei. Esol o kediane ta bolofei kaha sibige ke tawalamou degele ili.

*Godiha dibe you e bi bolodo dege dalamabadomou hagnosisolu*

<sup>13</sup> Kegei kaha, ni fiyege amaba, doudonou dalaguama. Yesu Kelesuha nimokou tama degeiba, Godiha ni habaguguele ke defeido dia dalama. <sup>14</sup> Afu, ni tawali mei kelege, niou ni tou e tagaiya kenou suluguadi keme haba ta degedama. Sisigo dia die ayeha ta dulo sesedi sagai, kenou tefema. <sup>15</sup> Godi, ni haguayadomou hagnosisai eme bolofeido. Nebe kenou tefei, nine Godiha o sasai bolodo dege dalaguama. <sup>16</sup> Yobe, Godiha kuguokou be kou gue nalai dala,

Ame ni Godi bolodo kaha degemou, nine ma sosou bolodo dalaguama. *Wok Pris 11:44-45*

*Godiha di mamoube, bi sibige hiyedoye mamou*

<sup>17</sup> Nige Godikou be ni Ayeyode diho baga tobolou idi. Di Aye e di fidibe, ege hu mei obou, hubou obou kokou ta duguo fidiyo mei. Godihage midihou, di milou gadi kenou duguo fidi. Kegei kaha degemou, ni sa sibige

kuokou dalagualibe, Godikou gue degeba, sa sibige koume ni sado meidade tawama. <sup>18</sup> Afu nime sibige mei midihō, ni kou guai o kedia nimokou hehegiei kenou milou ga idi. Kenou si, Godiha dugube, kasagaido degeimou, e ni kuhe mamou. Ni tewe, Godiha ni mamoube, sele igi silvabou, golbou kegeiye mamou li mei. Bi keme kasagai degedi binou. <sup>19</sup> Godiha ni mamoube, Kelesuha kafeiyenou mamou. Kelesube wai sipsip wili bolodo ke sa degei, sibigibou mei, kasagai ta dala mei. E kafeibe sibige hiyedo. <sup>20</sup> Sa sibige kou milou li mei kelege, Godihage Kelesuha di mamouyadomou kou maka degei. Kenou si uwage sawisieie hafei degeimou, e ni dogou gulamou tama degei. <sup>21</sup> Kelesu e degeiye, ni Godikou damaleyodele ili. E tolo imou, Godiha e haguagiemou, e hu hiyedo ke emokou nei. Kegei kaha, ni Godikou damaleyodema, e degeleyodei ke tama degeiba dugulamou dia dalagua kehe.

*Di di mogo dia defeido tagame*

<sup>22</sup> Ni ta damaledo ke dulo sesele iligi, Godiha dihile kokou sibigi ta dala mei kaha, ni damaleyodei o sasai kediamokou solou do degele ili kehe. Kegei degemou, ni niou sie tagaleba solou do degeiba solou do degeiba dema. <sup>23</sup> Yobe, nime fi boholou, dihi бага mala felemou, fi gehe dege dalagua,\* yobe ni Aye Godiha tobou kaha degeimou. Godiha tabe ta mei degele mei, you kegenou dalale. <sup>24</sup> Godiha kuguokou ne kege nalai dala, O sasai olou fei dibe dio sa degei.

---

\* 1:23 1:23 Jon 3:3-6 - Yesuhage Nikodemuskou be, name haba dihi бага mala feleyede tobou.

Dibe hebe fi sagai kegei, obe dugumou be bolodo.

Di o keme fafagadi.

Hebe fi keme migima mei degedi.

<sup>25</sup> Kenou si Hiye Oha tabe you tofousogo kegenou dalale.

*Aisaia 40:6-8*

Ta keme ta uwo bolofei o ilo kedia nimokou hehegile i.

## 2

*Ta makaibe Hiye O eme fi nedi mouti\* bolodo kokou ma tobou*

<sup>1</sup> Nime gehe dege dala kaha degemou, midihou kasagai milou gadi kebou, ogou gadi midihou kebou, taenou bolofei degedi midihou kebou, kona degedi midihou kebou, tobe tobou di midihou kebou olou feibe tou fogou ma. <sup>2</sup> Dihi dieye bu nale sagai hiyedo degedi sagai kenou tefei, nine Godiha ta bolofei ke dulo sagai hiyedo degema. Bu sibigibou mei kegei kahage, ni fi ke dogou guba, e hiyedo degele, haba nelene hiyedo dege dalale. Gehe degenou dalali, Godiha ni mamalaba, ni Godibou de bologuado dalaguale. <sup>3</sup> Hiye O e midihou ke dimokou hehegieimou ni kou dugulo i kaha degemou, nige Hiye O eme bolofeyode tawale ili.

<sup>4</sup> Ni Hiye Oha sou guedu ima. Eme fi nedi mouti bolodo, o kedia sibige mei бага kou igile muguye, haba Godiha makaibe, eme sibige hiyedo dala. <sup>5</sup> Nine fi gehebou de mouti sa degei, Godiha malamou, Duo Bolofeiha neleya kenou moso togoulu. Moso togoma mei degeba, nime

---

\* 2: (2:0 widio ta) Grik tage mouti-yodili mei, igi-yodei, Juda o kedia igi moso togolo idi kaha degeimou.

Godihā e mogōu du daladi o\* degele iba, bi Godihā tagale sagai kenōu nige Yesu Kelesuha huya ke emokōu nemabeedei.

<sup>6</sup> Godihā kuguokōu ne kōu gue nalai dala, Duguma, bitou Saion kotou a mouti\* ta fogolou kuhe. Mouti keme meleya mouti, sibige hiyedo, Godihā kōu makai dala.

O taha emokōu damaleyodebasi, o keme habage ta sidifi degele mei. *Aisaia 28:16*

<sup>7</sup> Damaleyodele i o sasai ni dugulube mouti keme bolodo, sibige hiyedo. Damaleyodili mei o sasai kedia dugulube, kōu guei dugulo ili,

Mouti, moso togodi o kedia dugube kasagai degeimou kōu igile filei keme e haba meleya mouti fogou. *Buk Song 118:22*

<sup>8</sup> Kōu guene kōu nalai dala, Die abogouye mouti kokou kuwagaba fiyasigile.

Damaledo, mouti hiyedo kokou be obe kuwagaba, mihikou fiyasigile. *Aisaia 8:14*

O kedia Godihā ta ke tobekou mugudi kaha degemou, kuwoumou be, dia mihikou fiyasigedi. Afudo, Godihage o kedia me kegenou degeleyodema kōu tobou.

<sup>9</sup> Kenou si nime Godihā you e o sasaiyodema kōu makai. Nime e mogou du daladi hiye o debane, e huti debane, e sosou debane, nime e midihō bolodo ke omokou hehegiemabodomou makai. Ege nime hulia sakou dala ke tou fogou ba, hohō bolofei kokou fogou haguamabeedema

\* 2:5 2:5 Afudo, mogou du daladi o ('pris') kedia Moseshā kuolou ta ke dulo seselemou, gali sile, Godikou nele idi. \* 2:6 2:6 Mouti keme damaledo mouti mei, keme Yesu. *Bitou Saion keme sa Jerusalem.*

haguisai. <sup>10</sup> Afu, nime mōu youwa deleigueiye, kenōu si ifibe nime Godihā o sasai degei. Afuge, nime Godihā habaguguei midihō ke ta tawale ili meiyē, haba ifisi Godihā habagugueibe nibōu de dala kehe.

## O sasai kedia diho tageya ke di midihō doudonōu milōu ga suluguame

(Ta Hiye 2:11-3:22)

### *Dibe Godihā dabai degedi o sasainōu dalame*

<sup>11</sup> Ma mogodo diama, nime sa mei o sagai kaha, a egele tobōu ba ni duma. Sa sibige kuokōu midihō kasagai, ni tōu e tagali sagaiya ke hobōu degedama. Midihō kasagai ni fibōu de biyadi ke tobolōu. <sup>12</sup> Ni Godikōu damaleyodili mei o sasai kediabōu de dalagualibe, midihō dōudo kenōu milōu gama. Kege degeibasi, ni susuga tobolōu idi o kedia ni midihō bolofei ke duguoba, Godihā di dugu haguale kelege, dia Godikōu hohobolōu ile.

<sup>13</sup> Nime Hiye O Kelesukōu damaleyodei o sasai kaha degemōu, ni gamani o olōu fei kedia ta dulo sesema. Gamani o olōu fei die hiye o, eme hu hiyedo, sa sibige kuokōu o sasai di hu olōu fei ke gabama felei. <sup>14</sup> Gamani hiye o kaha dabai degele idi o kedia tane dulo sesema. Gamani hiye o kahage e dabai degele idi o kedia tobōu mōu ya, sa sa olōu fei kile midihō kasagai milolōu idi o kedia egele womōu, haba midihō bolō degedi o kedia mokōu be bolofeyode tobōu mōu suluguamabeede tobou. <sup>15</sup> Godihage nime midihō bolofei kenōu milōu mabeedema tagali. Kege degeibasi, totōu degei o, taenōu tobolōu idi kedia ni midihō bolō ke duguoba, nimokōu



susuga tobolou idi midihō ke tou fogou le ile. <sup>16</sup> Nime hebe kasagai ta molou meidade tawaleba suluguama. Kenou si ni kege tawaleba sulugualibe, midihō kasagai haba ta milou gadama. Nime Godiha dabai degele idi o sasaidade tawaleba suluguama. <sup>17</sup> O sasai olou fei kediamokou midihō bolō kenou hehegiema. Damaleyodele i o sasai olou fei kediamokou ne solou do degeba, Godiha hayedu dalali, gamani hiye o e hu hebele foguma.

*Di Kelesu e hagi dugudi midihō kenou sesame*

<sup>18</sup> Dabai degedi o sasai diama, ni bōse dia ta ke dulo sesame. Age bōse bolofei kedia ta kenou sesemabdomou tobou yo mei. Bōse ilo kelebe kou midihō kasagai milou ga idi oye, kenou si nige die ta kene dulo sesame. <sup>19</sup> Nime Godiha younou dogou guo dalaba dabai degeligi, bōse dia nimokou hagi mou youwa neiba, ni neledo dege dalabasi, Godiha nimokou bolofeyode tobolou. <sup>20</sup> Haba ni midihō kasagai ta milou ba, ni bōse dia ni egele wouba, ni neledo dege dalababe, Godihage nimokou be ta hohō degele mei. Kenou si, ni midihō doudo kenou kou milou ba, haba ni bōse dia mou youwa egele woubabe, ni neledo dege dalabasi, Godihage nime midihō doudo degeiba dugulo.

<sup>21</sup> Ni dowoye, Kelesu e hagi hiyedo dugu kaha dege-mou, Godiha nine hagi dugumabeedema hagnosisai. Hagi, Kelesuha dugu keme you nimokou hegi, nine tawaleba sesemabdomou. <sup>22</sup> Damaledo,

Ege midihō kasagai ta milou li mei. Haba ogou gai tane ta tobou li mei. *Aisaia 53:9*

<sup>23</sup> O kedia Kelesukou ta bou basia tobou mou be, ege ta sima tobou li mei. E hagi hiyedo duguye, kenou si ege diamokou midihō kasagai kaha hebe ta neleyode tobou li mei. E yousie Godikou nei, Godihage obe douonou fidi kaha degemou. <sup>24</sup> Kelesuha di midihō kasagai kaha hebe ke mala, hebe fufuguomai kou diou gou mou, e tolo i. Dige di midihō kasagai ke tou fogou ba, gehe dege dalaguali, midihō doudo ke milou gamabadomou e kuhe tolo i. O kedia Kelesu hiligedo wala imou, e do hiyedo dugu kaha, nime bolō degele i kehe.

<sup>25</sup> Afu, nime wai sipsip sa degei, fi totou dege suluguadi, a doudo kenou sesele yadiyo mei. Kenou si, ni boholou ma ya, wai sipsip dia daladi Hiye Okou fologa dalaguamou be, ege ni fi olou fei ke dia dala kehe.

### 3

#### *Obou sasibou hulomou daladi midihō*

<sup>1</sup> Sasai o hu diama, nime ni maha ta dulo sesema. Ni maha Godiha ta dulo sese ho fogou babe, sasai nige midihō bolō ke milou basi, dia duguo fi boholou ile. Ni Godiha ta diamokou kou hehegie tobolou sagai meiyē, kenou si ni midihō bolonou milou babe, dia ke duguoba fi boholou ile. <sup>2</sup> Yobe, dia dugulobe, nime ta dudi sasai, haba ni midihone doudo kenou milou ba dugulo ile. <sup>3</sup> Sasai ni similolou be, ni tou bou, ni widio towebou debe sele igi golbou, yukuei bolō bolobou kenou ka idama. <sup>4</sup> Sasai ni degele bolofeibe kou gue, ni duledune, nebe kenou tefele similou ma. Kegema, amafeinou dalaguababe, ni fi bolofei keme ta mei degele mei. Godiha dihile kokou nime

bologuado dalaguaba, Godiha dugulobe sibige hiyedo dugulo. <sup>5</sup> Godikou damaleyodele i sasai, afudo deleigui kediane kege degele idi. Dia Godiha degeleyodei ke dia dalaguali, die duledu amafeinou similolou dalaguali, die maha ta ke dulo sesedi. <sup>6</sup> Sasai Sara ene e maha ta dulo seseligibe, name ma hiye oyode tobou di. Ni midihou bolofei ke milolou gue dege ho fogou babe, nime Saraha e sisigo sagai dege dalaguale.

<sup>7</sup> Sasai hu o diama, nine ni sasibou de dogou guo sulugibe, ni saaikou midihou bolonou milou ma. Sasibe nele hiyefei mei. Nele, o ni dala sagai kegei mei kaha degemou, dia nimokou ta tobou babe, nige defeido duma. Godiha o nimokou solou do fi gehe nele sagai kenou tefele, sasai kedia mokou ne fi gehe nele. Ni a tobolou ke dulo seseibasi, ni Godikou diho baga tobolou keme midihou kasagaiye ta akogulo sagai mei.

*Ni niou sie yogokou midihou bolou kenou degeiba degeiba dema*

<sup>8</sup> Ise, a uwage ta tobou ladi. Ni niou sie fi tanou degeiba, fi tanou degeiba dema. Tabe, ni niou sie yogokou solou do degeiba solou do degeiba dema. Nime Kelesukou damaleyodei kaha degemou, ni niou sie tagaiba tagaiba dema. Haba niou sie yogokou habagugueiba habagugueiba dema. Tabe, niou ni hu hebele fogudama. <sup>9</sup> Oe nimokou midihou kasagai hegibane, ta bou basia tobou bane, ni hobou muwou milou dama. Midihou kegei ke nimokou degeibabe, nige Godiha o kedia dogou guyedema diho baga tobou ma. Godiha ni kege degemabeedema

haguisaibe, ege nimokou midihō bolofei ke hegilamou degei.

<sup>10</sup> Di tewe,

O koyo na bologuado dalale kebou,  
haba sawisie bolofei dugulo kebou de tagaibabe,  
na ta kasagai bou, ogou gai tabou de hobou tobou mou  
siada.

<sup>11</sup> Na midihō kasagai ke tou fogou, fi boholou ba, midihō  
bolofei kenou milou yedei.

O sasai kediabou de mogo degeba, fi tanou dege dalayedei.

<sup>12</sup> Yobe, Hiye Ohage midihō dou do milou ga idi o sasai  
kediame duguomou dia daladi.

Dia emokou diho baga tobolou imou be e dudi.

Kenou si midihō kasagai milou di o sasai kediame ege  
tobekou mugu dala. *Buk Song 34:12-16*

*Di midihō bolō milōu mōu dimokōu hagi hagulu keme tǎbōu  
mei*

<sup>13</sup> Ni midihō bolodo milou laba degeibabe, o koyohage  
ni wolo? O ta mei. <sup>14</sup> Kenou si, ni midihō bolō milōu di  
kaha dowo ke hagi dugubabe, ni hohonou degema. Yobe,  
Godiha kuguokou be kou gue nalai dala,

O taha nimokou gue neibabe, ni hobou kesigie gue  
degedama. *Aisaia 8:12*

<sup>15</sup> Ni Kelesukou nou damaleyodema, enou si ni Hiye Oyode  
tawama. O tae nimokou kou gue yodubabe, kagemou nime  
hebenitou bologuado duwolo ke dia dalagua deibabe, ni  
ama dala kaha yo ke o kokou defeido tobou ma. <sup>16</sup> Kenou si  
nime damaleyodele ili mei o sasai kediabou de ta koubabe,  
dia yoduga ili ke duloba, diamokou be himido degeba,

amafeinōu tobōu ma. Nime Godihā dihile kokōu dōudo dalaguadade tawaibabe, nige damaleyodele ili mei o kediamokōu midihō bolōdo kenōu hegiba, diā ke duguoba, Kelesuhā midihō ni milōu gadi ke susuga tobolōu idi ke tōu fogōu ba, diōusie file dugu kasagai deba, sidifi degele ile. <sup>17</sup> Dibe Godihā tagaiya ke midihō bolōdo milōu gadi kaha dowoye di hagi dugubabe, keme tabōu mei. Haba midihō kasagai milōu di kaha dowoye hagi dugubasi, keme kasagaido.

*Kelesuhā teibe e di mamōu lamōu kuhe tolo haguai*

<sup>18</sup> Kelesu eme ta degeli meiyē, kenōu si dōudo mei o sasai di dowoye, e tolo i, di midihō kasagai kaha hebe ke ta moye domōu. Ni Godikōu wōu ma ilamōu, e tanōu fei tolo i kehe. Haba tage ta tolo ile mei. Sa sibige kuokōu ge o kedia woumōu tolo i. Kenōu si Duo Bolofeiha degeiyē, e hagua gehe degei. <sup>19</sup> Kegemōu, e fi kaha mulomōu, Godihā tā ke tei fi ilo didiō degei dalagua kediamokōu hehegie tobou. <sup>20</sup> Tei fi keme Noaha delei kelege Godihā tā dulo ili mei o sasai tofigile i kedia fi. Damaledo, Noa e dalali, mosole moso togoumōu be, diā midihō kasagainōu milōu ga imōu, Godihā duguo fogōu dalali, Noaha mosole moso tegei ke mei degei. Kegemōu, o sasai olōu fei 8 kege kedia mosole foudu fologoumōu, to gihou hiyedo kōu hagueiye, kenōu si diame ta hueiye weli mei, Godi you dogou gu. Sa sa o sasai suudo, olōu feibe to gihouye woma mei degei. Yobe, diā Godihā tā dulo sesele ili mei kaha degemōu. <sup>21</sup> To gihou keme fafeleya tofou di ke sa degei. Fafeleya tofolou imōu, Godihā nime you kōu moye. Fafeleya tofou

di midihō keme tō toti sagai kegei mei. Di tō toumōu be, sibigi di tōu guebōu dala kenōu bigima mei degedi. Kenōu si, fafeleya tofolōu idibe, di duo sibigi mei degeba, Godiha dihile kokōu bolonōu dalagualeyodema kuhe degele idi. Godiha Yesu Kelesu haguagi kaha degemōu, di fafeleya tofōu mōu be, e di mōudi. <sup>22</sup> Kegemōu, Kelesu e hebenitōu folo, Godiha dobogōu delekōu duwomōu be, esol o daga dagabōu, duo daga dagabōu, hubōu bi ilo kelebōu olōu fei kedia e nele kaha hayedu dalaguali, e ta dulo sesele idi.

**Damaleyodele i o sasai kediamе tefele  
dugu hiyedo duguomōu, hagi hiyedo  
dugulo i**

*(Ta Hiye 4-5)*

#### 4

*Di tōu e tagadi midihō kasagai olōu fei ke tōu fogōu me*

<sup>1</sup> Kelesu e tōu be do hiyedo dugu kaha degemōu, ni e fimai sagai kenōu tefele fimama. Yobe, o taha e tōu be do dugu debabe, midihō kasagai e milōu di keme tobekōu muguo mei degei. <sup>2</sup> O kegei keme sa sibige kuokōu dalabe, tōu e tagadi midihō kasagai keme ege dafadi. Godiha tagali kenōu sesele ile sagai degedi. <sup>3</sup> Damaleyodili mei o kedia die tōu e tagadi midihō kasagai ke milōu ga idi keme afu nīne hiyedo milōu ga idi. Damaledo, sasai hiyou siadi midihōbōu, o hiyou siadi midihōbōu keme ni kōu milōu ga idi. Ni tigi kolo huei gofōudo nama fi totōu degemōu, ta kasagai tobōu dibōu, midihō kasagai milōu dibōu ke hiyedo degele idi. Haba ogōu gai godi kedia

egei kene ni kôu dulo sesele idi keme kasagai hiyedo. Midihô olôu fei kegei keme haba ta degedama. <sup>4</sup> Ifibe nime damaleyodele ili mei o sasai kediabou de geleguoba, midihô kasagai milolou be dafa ili. Dia ke duguo kesigiemou, damaleyodele i o sasai nimokou ta bou basia tobolou idi kehe. <sup>5</sup> O sasai kedia kege degemou ibe deba, ta sale sawisie ke tama degeiba, Ta Sai Fidi O kaha diamokou be, ni kadegeimou kege degemou haguei? de yodulo. Ta Sai Fidi O ege ama dalali, tofigili mei obou, tofigile i obou olou fei ta sale dala. <sup>6</sup> Kegei kaha yobe, tofigile i o sasai kediametele mei kelegebe, o ilo kelege diamokou ne ta uwo bolofei ke kôu hehegiemou suluguei. Diate sa sibige kuokou be kôu dalaguali tofigile i, midihô kasagai milou di kaha degemou. Kenou si Godiha diamokou fi gehe neimou, diame Godi you sa degei dalagua.

*Nele, Godiha dimokou nemou i dala kaha degemou, di dabai defeido degeme*

<sup>7</sup> Uwage sawisie ke hafei degeli kaha degemou, ni fi gofou do dege tawaleba, defeido sulugualibe, Godikou diho baga tobolou nou suluguama. <sup>8</sup> Nime Godikou damaleyodele o sasai degei dalagua kaha degemou, ni niou sie yogokou defeido solou do degeiba solou do degeiba dema. Solou do degedi midihô kahage midihô kasagai milou gadi keme olou fei akogudi. <sup>9</sup> Sa ta tie o sasai, Godikou damaleyodele i kedia ni sabekou ya fologoubabe, bologuado dia dalama. Kege degedi midihô keme dafadama. <sup>10</sup> Godiha ni habaguguemou, nele daga daga ke nimokou solou do nemou i kaha degemou, ni dafa

idama, Godiha dabai defeido degeleba, ni niou sie yogo dogou guba dogou guba dema. <sup>11</sup> Godiha e ta hehegie tobou di dabai keme namokou nei debabe, na Godiha ta kenou hehegie tobou yedei. Haba Godiha o sasai dogou gudi dabai ke namokou nei debabe, na Godiha e neleya kenou dabai degemou i. Ni kege degeibabe, o sasai ilo kedia duguoba, diane Yesu Kelesuha huya ke Godiha hu hebele fogulo sagai degele ile. Godiha e hubou e nelebou keme hiyedo folodo. Dige emokou hohobolou ba, tofousogo tofousogo kegenou dalaguame. Damaledo.

*Dige Kelesu e hagi dugu sagai kenou tefele duguoba, hohonou degeme*

<sup>12</sup> Mogo diama, ni tefele dugulu keme douye galai do sagai kegei ke dugubabe, ni ta kesigidama. Ni hobou anou duguluyode tawadama. O sasai olou fei kegei duguludade tawama. <sup>13</sup> Kelesu e hagi hiyedo dugu sagai kenou tefele nine hagi dugudi kaha degemou hoho degema. Kegeibasi, nige Kelesuha e hubou e nelebou ke tama degeiba duguoba, ni hoho hiyedo degele ile. <sup>14</sup> Ni Kelesuha hu ke tolou dala kaha degemou, oe ni susuga tobou babe, ni hohonou degema, Godiha Duo Bolofei eme nibou de dala kaha degemou. E hohobou e nelebou keme hiyedo folodo. <sup>15</sup> Hagi ni dugulobe, ni o wei deba, hiyou mou deba, midihou kasagai ta milou deba, haba, o ilo kedia dabai degeli ta makei deba kaha dowoye hagi dugubabe kasagai. <sup>16</sup> Ha, Kelesukou damaleyodei kaha dowoye hagi dugubabe bolou, sidifi degedama. Hagi kegei ke dugubabe, nime Godikou hohobolou nou dalama, yobe nime Kelesuha hu ke tolou dalagua kaha degemou.



<sup>17</sup> Godihā yōu ē sosōu di tā sale keme hafei degei. Godihā dibukōu tā sama mei degeiba, haba o sasai, e tā uwo bolofei ke tobekōu mugulo idi kediamokōu kage tama degele keme di ta tewe mei. <sup>18</sup> Godihā kuguokōu be kōu gue nalai dala,

Dōudo o sasai kediamē hagi hiyedo dugumōu ibe deba, Godihā diā kuhe mamolōuyodei. Kenōu si, Godi tobekōu muguo dalagua o sasai bōu, midihō kasagai milōu gadi o sasai bōu kediamokōu be Godihage kage degele? *Gutpela Sindaun 11:31*

<sup>19</sup> Kegemōu, Godihā tagaliya kenōu hagi dugumōu suluguadi oyege diōusie Godikōu neleba, midihō bolonōu milōu mōu sulugumabeedei. Dibe Godi yōu milou kaha degemōu, e sawisiei olou fei di bologuado wolou daladi, di ta tōu fogou diyo mei.

## 5

*Sosikōu widio o diama, nige Godihā o sasai kediamē bologuado dia dalama*

<sup>1</sup> Sosikōu widio o diama, a nimokōu tobōu ladi kuhe. Yobe, ane sosikōu widio o. Age Kelesu ē hagi hiyedo dugumōu mayōu mā dihoje dugu. Abōu nibōu di olōu feibe hebenihā hohō ke tama degeiba dugulo ile kaha degeimōu, a nimokōu tobōu ladi kōu duma. <sup>2</sup> O ilo kelege wai sipsip dia daladi sagai kenōu tefele, nīne Godihā o sasai dia dalaguama. Dabai ke degelebe, oe nimokōu tae diasele tobōu banōu degedama, Godihā tagaiya kenōu hohō degeba degemōu ima. Dabai kaha dowo molōu sagai hobōu degedama. Mōu tagaleba hohobolōu degema.

<sup>3</sup> O sasai ni hayedu dalagua kediamokou be nige ta diasedama. Ni midihou bolodonou milou ba, dia duguo sesele. <sup>4</sup> Kege degeibasi, wai sipsip dia daladi Hiye Oha hagua tama degeibabe, nime dabai ni degedi kaha hebe bolodo ke mala ile. Hebe bolodo keme di ta tawaga tobolou sagai mei, ta tabaleba mei degele mei, you tofousogo tofousogo kegenou kuhe dalale.

*Di diyou sie Godiha hayedu dogogume*

<sup>5</sup> Gisiai o diama, nebe kenou tefele, nime odo kedia ta kenou dulo sesema. Ni olou fei niou sie huyafei degeiba huyafei degeiba dema. Yobe,

O sasai diou die hu hebele fogulo idi kediam Godiha degeiye, diame huyafei dege daladi. Kenou si o sasai diousie huyafei degele idi kediam, Godiha habagugueibe diabou de daladi. *Gutpela Sindaun 3:34*

<sup>6</sup> Kegei degemou, ni niou sie huyafei degeba, Godiha hayedu dalaguababe, sawisie yoi makai kegenou si, e ni hebele fogulo. <sup>7</sup> Godiha nimokou solou do degedi kaha degeimou, hagi olou fei ni dugulo idi ke kefemaba, Godikou nou dogoguma.

<sup>8</sup> Ni fi gofoudo dege tawaleba, amaga suluguama. Nibou ho mai o Tamabe ta uwo hiyedo, nebe fuse hiyedo laionye degedi sagai kenou tefele tamou siadi. Hegie hiyedo degeimou, o nalamou ka sulu. <sup>9</sup> Kenou si, ni damaleyodei keme neledo dege dalaguali, Tama tobekou muguma. Ni tewe, damaleyodele i o sasai, sa sa olou fei tie kediane hagi hiyedo, nebe ni dugulu sagai kenou tefele dugulo idi. <sup>10</sup> Godi eme habaguguedi midihou olou fei kaha e yo.

Damaledo, Kelesuha huya ke Godihage nime hebeniha hoho kokou haguamabeedema haguasai. Ni hagi tou degenou fei dugumou ibe deba, ise you ni bologouba bolodegeiba, ni damaleyodei ke dedei sasagieiba, nime neledo dege dalaguali, tofousogo tofousogo tofolou ile. <sup>11</sup> Godiha e hubou e nelebou debe hiyedo folodo, tofousogo tofousogo kegenou dalale. Damaledo.

*Uwage ta*

<sup>12</sup> O Sailas ege a dogou guomou, kuguo tou degei kou nalolu. A dugulube, eme di mogodo, eme damaleyodeibe defeido tolou dalamou dugulu. Kuguo koume a ni dedei sasagielamou nalolu. Haba tabe, Godiha habaguguei kaha ta, a hehegiEDI keme damaledo ta, ni ke tawamabadomou a kuhe nalolu. Ni ke damaledo-yodema, neledo dege dalama.

<sup>13</sup> Damaleyodele i o sasai sa hiye Babilon\* tie koudia nimokou agali bolofeyode tobolou ili. Nibou, diabou olou feibe Godiha you e biyodema makai. Ma dihi Mak\* ene nimokou agali bolofeyode tobolou. <sup>14</sup> Damaleyodele i o sasai ni niou sie yogokou solou do degeimou solou do degeimou dedi kaha degemou, ni niou sie nogou gama.

Age nime Kelesubou de dogou guoba, bologuado dalaguale ke tagali.

---

\* 5:13 5:13 Sa hiye Babilonbe sa hiye Rom sa degei. Sa Babilonyodei kaha e sibigebe kou gue, sa Rombe midihou kasagai milou gadi sa, Babilonnou tefei.

\* 5:13 5:13 Mak eme Pitaha e dihido mei. Eme o gisiai Pitabou de dabai degedi. Kegei kaha degemou, Pitahage e dihiyode kuhe tobou.

Godihā Tā Bolofei

Konai: Godihā Tā Bolofei New Testament

Nupela Testamen long tokples Konai long Niugini

copyright © 2014 Wycliffe Bible Translators, Inc.

Language: (Konai)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 28 May 2022

8c47cab8-fc6e-524e-936f-c52eba70db94